



割
威
心
王
三
日



天主降生壹仟捌百玖拾柒年

香
港
主
教

和
准

香港納匝肋靜院印版

自叙

余履隆林已有年矣。然思幼承父母善訓。長蒙師友教益。畧識數行字跡。名未成而利未就。弱冠之年。遭逢亂賊。擾攘焚殺。蹂躪離鄉別境。徧歷滇黔等處。飄泊半生。九流三教。諸子百家。無不悅而樂觀。迨至五七之年。躬逢

天主聖教。即欣歡樂從。業經廿載。於茲矣。常閱道理諸書。無不盡善盡美。大加益於心身。今春蒙本堂神父給與一編。玩其

額曰。聖教辨真。余即深喜以爲必係吾教至切之書。袖之以歸。視其篇首。乃西曆一千八百八十一年。即光緒七年。著於四川重慶府耶穌堂。刊刻刷印。又一圖書。由貴州省北門內車家巷

發給。覽其次第。乃係耶穌教之人特作此書。毀謗吾等天主聖教之行爲。其中言語。強拉聖經爲憑。而不本乎聖經。扭捏異教爲言。而不合乎異教。實係畫蛇添足。班門弄斧。言善悉能感發人之善心。言惡未免懲創人之移志。察其書內言語。章章句句。均係毀謗主教神父之甚。余奉教二十餘年。未聞主教神父。道及耶穌教之非。前後細看。不禁怒從心上起。惡向膽邊生。不是善人起惡意。乃係惡人打動善人心。出於情不得已。仰即書中之言語情詞。仰話復話。因其來者不是。答者有餘。遂逐端逐件。分駁明晰。輯成一帙。名曰剖惑至言。其中所函情節。並非強詞奪理。無非逐端畧駁一二。悉合至情。彼教不守本分。作書刊刻。

凌人。縱其至愚見。即不能容忍。故孔子云。是可忍也。孰不可忍也。非余之言語不遜。乃彼教之情詞過刻也。奈余書理淺薄。言語粗蠢。見者休哂爲幸。諸其宜諒之。非余多言滋事。觀吾天主教。行於各方各國。幾及二千載矣。專以勸善爲本。任是野族蠢蠻。吾之主教神父。竭罄心力。無不化道。使之守規認主。悉歸王化。未嘗自矜自滿。謙而愈謙。遜而愈遜。致使人心悅服。樂而欽崇。各方各國。上自天子。臣宰。下及士農工賈。幾徧寰宇也。何敢以盛氣而凌人哉。無如今之耶穌教士。竟昂然肆志。目橫四海。咸若無物。任其搖唇鼓舌。播弄是非。教雖歧裂三百餘載。悉未若今之耶穌教士。精明利幹也。將無作有。強扭天心。人意喋

喋便便。損人利己。子貢云。人雖欲自絕。其何傷於日月乎。多見其不知量也。余雖不才。老邁無能。畧無知識。忝入天主聖教。二十餘載。年近六旬。爰觀是書。不忍甘受彼教凌謔。孟子有云。窮則獨善其身。達則兼善天下。恐其多言招尤。故筆之於書也。

降生一千八百八十八年

大清光緒十四年歲次戊子孟夏月下浣穀旦廣西泗城府凌雲縣後學瑞堂氏陳光瑩書於西林縣

崇山經堂之玩月書齋

剖惑至言序

嘗聞人生斯世上。承天主生養保存之恩。下感父母撫育訓誨之德。五官齊而百體備。斯極美矣。不可逕爲無教之徒。故孔子云。有教無類。而不省教之善惡好歹。隨風披靡。無所適從。而定依歸。斯亦教之猶未教也。然則人之有教。如水之有源。木之有本。食菓須探本。飲水務思源。窮究至理。亘古歷今。是其教之不可忽也。孟子云。教亦多術。宜當擇其善者而從之。其不善者而改之。庶無悖謬可也。何則。因

天主聖教。自開闢至今。一主而已。創立性教。垂諭書教。及後漢

季吾主耶穌降世爲人。躬傳聖教。救世功畢。受難升天。貽訓宗徒。爰立教皇。世代繼述。無或間斷。萬國欽崇。萬民景仰。實乃萬國之共主。萬民之公父。自漢至今。幾及二千年於茲矣。正道惟一。素無二志。非比佛教。荒唐不經。各方各教。互相矛盾。吾儕詰之。彼稱佛八萬四千教門。由自作而已。惟吾

天主聖教。則非是之謂也。况仲尼有言。誰能出不由戶。何莫由斯道也。原其黑可混白。而白則不以可染黑。倘稍沾黑。即非純白也。故天主教。至真至正。至一無二。千古不易。無如近三百餘年來。有原奉天主教之人。輒因纖介之細故事。

理些微不合其私。遂至各立門戶。稱爲重整教。背叛教皇。抗逆天主。妄自尊大。今則更名耶穌教。其意欲與吾教並驅。中原遐邇同仁。以存利濟之心。各行各道。安守本分。有何言哉。人之從違。隨其所欲。古云萬物並育而不相害。道並行而不相悖。此吾輩之素志也。詎料彼教不自揣度。美己之長。道人之短。未免刊刻僞書。抑清揚濁。深譏吾教。敬主崇聖。一切祕跡之端。似非吾主耶穌立教之本意也。竊恐彼教著書毀謗吾教。人人默受。異日釀小至大。俾吾教中列昆諸友。覩茲妖言。搖惑心身。稍有信根不堅。而致受其蠱惑。心無定見。隨風飄浮。以蹈危險之地。殊堪憫惜。於

是悉將彼教所毀之情。逐端詳看。是非本末。分晰剖明。特著一編。顏其額曰。剖惑至言。分駁精粗。而澄涇渭。奠吾教之人。經其始。而植其基。幸勿因雌黃之言。搖感。而皮裡自懷春秋。卽吾之所厚望也。慎之免之。以是云爾。

降生一千八百八十八年

剖惑至言

魯論語云。君子有三畏。畏天命。畏大人。畏聖人之言。小人不知天命而不畏也。狎大人。侮聖人之言。此乃孔子要言。以警後世。勿似蕞爾羣小。輕聖毀賢。而不知畏懼顧忌哉。鄒孟常言。有天爵者。有人爵者。仁義忠信樂善不倦。此天爵也。公卿大夫。此人爵也。古之人。修其天爵。而人爵從之。今之人。修其天爵。以要人爵。既得人爵。而棄其天爵。則惑之甚者也。終亦必亡而已矣。此孟子警人爲善不終。貪得無厭。以天命而從人欲。不知修省之小人。朝秦暮楚。取悅於人。毀謗聖賢。終必淪亡。人不務實。又何益哉。

第觀古傳先賢之至言。人能改過自新。誠心向善。純一。惟獨至死不變。不可畏難而苟安。他日善行昭著。自必獲福無量矣。何則。竊思吾儕生諸天地之間。處於塵寰之上。苟能仰不愧於天。俯不忤於人。感天地蓋載之恩。荷日月照臨之德。沐皇王水土之惠。承祖宗生成之澤。父母養其身。師友長其志。塵慮縈心。以茲揣懷。飲水思源。遡迴而上。萬物不能自生。人類不能自育。古今一轍。知有一主宰而治之。實當欽崇一至尊無對。至一無二。神妙無窮。全能全知。全善無始無終。無極慈愛之天主。造天地神人萬物。賞善罰惡。亘古迄今。纖毫不爽。以致令人守其誠命。謹言慎行。虔心事主。及至死後。冀其靈魂。賞登永福之域。永遠

敬愛天主。及至吾主耶穌。俯降塵世。垂訓立表。周遊州縣。心傳口授。面諭宗徒。曰。爾等往普天下傳教。施洗萬民。行七秘跡。克七罪宗。守其聖令。奉其真教而已。

真教維何。曰。緣昔吾主親立教皇。爰設鑒牧鐸德代理。聖教真宗。千八百年來。教無二旨。人無二意。詎料近來。三百年間。逕有將聖教歧分爲二。自立門戶。誦吾正教。尊主崇聖。秘跡懸像之舉。然吾天主聖教。自吾主耶穌復活升天。立聖伯多祿爲聖會之首。創業垂統。御極於羅馬國。繼述耶穌之真傳。總理教務。貽世綿延。以迄於今。道統遞傳。神權專屬。而歸於一。乃當今羅馬國之教化。皇由聖伯多祿以來。傳衍及今。以歷二百餘世。純一

不變。徧及萬國。恒常如一。自立教會之後千八百年如一日。億兆人事一主教化。皇以下設有主教神父。代理宣化。分駐天下。世代相傳。世代恆存。毫無間斷。永不更改。一字不差。由此觀之。可見天主聖教實係爲真爲正。非他邪教之比也。

天主聖父使聖子降生爲人。立表垂訓。諄諄誥誡。以七跡爲救靈妙藥。將十誡作拯溺筏寶。守諸聖令。克七罪宗。欽崇一主。而救靈魂。未嘗令人將聖子所傳之教。分裂爲二。使其一事天主。一事耶穌。試思天主爲誰。耶穌爲誰。天主乃創造天地神人萬物之真主宰。一體三位。父子聖神。不紊其位。不分其體。榮耀均平。威儀同永。無始無終無限。全能全知全善。無所不在。賞善罰

惡權在掌握。雖使聖子降世爲人。未嘗暫離天堂。縱取人性。亦未嘗離却天主性。在世之三十三年。天主無時不在人間。亦無時不在天堂。耶穌雖在塵世。依然還是一個天主。受難升天也。只是一個天主。豈得以耶穌在世。而有兩天主哉。况天主乃分位不分體。

耶穌在世傳教。非傳自己之教。乃傳天主聖父之教。非欲立二門。使彼奉天主。此從耶穌。惟要信輩同信同愛一天主。同心欽崇天主的聖子耶穌。故此福音書有曰。奉吾聖父之旨而已。凡遵我者。即遵我聖父之旨也。凡迎我者。即迎我聖父之使也。凡悖逆我者。即悖逆我在天之聖父也。非惟傳教之際爲然也。觀

其幼時論道於司教之中。其聖母瑪利亞曰。我子。爾父與我尋爾。耶穌答曰。此遵吾父之命。而完吾父之事焉。尋我爲何。由此觀之。吾主耶穌。由少至長。未嘗片刻而離天主之性也。豈肯令人將其所立之教歧分爲二。棄却天主之尊榮。而立其降世之耶穌爲名者哉。

况經云。耶穌有兩性。天主性。人性。兩性結合在一位。成一天主。耶穌基斯督。誠哉斯言也。耶穌乃是天主。天主成人。即是耶穌。倘以救世之天主。立名耶穌。而即以耶穌之名立教。則必視耶穌爲天地以後一人而已。何以稱爲救世之天主乎。

若但以人所立之教爲正教。則我中國之有老聃李耳。稱爲太

上老君。混元上帝。元始天尊。自立道教。傳至玉皇趙侯。千枝百派。屈指難數。又如天竺國之釋迦牟尼。稱爲西方聖人。阿彌陀佛。自立佛教。竟有千千諸佛。萬萬菩薩。開八萬四千之教門。使人信從。妄議輪迴六道。薦拔深幽。開道度亡等謬。

倘以耶穌之聖名。自開門戶。私立教類。則是悖送天主。以人世立教。殊無異於佛老二氏之教也。何則。蓋老君釋迦。乃天地以後之人。自逞聰明。著書立教。以其異端邪術。簧惑世人。而吾主耶穌則非二氏之比。雖其生在人世。非由人道。乃因天主全能。聖神妙功。降孕於童貞女瑪利亞而成。然其未生之先。天神預報聖母。若瑟使其信認真是天主子降生。既生之後。又復顯

示於牧童三王。使其尊敬朝拜。惡王荼毒。則默示若瑟避於厄日多國。七載示回故址。至於三十歲受洗若翰於若爾當河。維時天開。空中有聲云。此我愛子。吾所喜悅者。爾等必遵。其後招徒傳教。種種異跡。則非世人可能比。焉得由人自作。竟以吾主聖名。私立別教。而徒以聖經。扭捏數言。愚惑世人。尙敢擅造偽書。譏誚天主聖教。懸貼聖像。敬十字聖架。及洗滌告解。諸端秘跡。敬禮聖母諸聖。以及婚姻嚴齋。茹葷等事。

由是觀之。彼教之猖獗匪輕。而徒以巧言爲飾。以悅人聽。謬引聖經之奧旨。掩耳盜鈴。譏吾教中數端。均係無稽之言。不足憑信。但其所言。似是而非。吾欲捲口結舌。不言彼教之過。又誠恐

吾教之人。有信根未堅者。觀其粉飾之詞。悞認爲真。而致墮其詐術局中。受其引誘。簧惑。勢出不已。只得將其毀謗之情節。逐條分駁。以致真假立見。而涇渭自分矣。

粵稽吾主耶穌降生於如德亞國。與吾中國共屬亞細亞洲。在昔漢朝哀帝元壽二年。歲次庚申。在世三十三年。授徒傳教。立表垂訓。顯諸異跡。然後受難。釘死復活。四旬講論天國之事。建立聖會基址。以伯多祿爲聖會教化總王。親定聖事七跡。命徒往天下萬國傳教。授洗萬民。業已經歷一千八百八十餘年。未或紊亂。萬國同然。古今一轍。

考查耶穌教。由主升天。千有餘歲。未聞其名。近因稽其底蘊。實

跡數百年前。方出三人。一名羅德祿。生於降生後一千四百八十三年。陽壽六十三歲。歿於一千五百四十六年。恩利格。生一千四百九十一年。壽五十六歲。亡於一千五百四十七年。加未諾。生於一千五百零九年。壽五十五歲。死於一千五百六十四年。按此三人。背主求榮。委棄真道。叛逆教皇。自此而始。

稽其行爲。羅德祿乃係日爾曼。即今德國人也。父母生其弟兄姊妹。男女十有餘人。旋因雙親衰邁。家道平常。費用浩繁。日食維艱。難於撫育。彼遂棄親。逃出。隨處浪遊。投師就學。攻讀詩書。所有食用。則乞食於鄰人。早晚沿門丐化。日夜苦讀寒窗。奮志

滋生。

時有寡婦孀居。家道饒裕。奈其無子。以慰暮年。見其青年俊雅。詢其來歷。遂嗣之以作螟蛉之子。於是專心致志。樂意誦讀。長而穎悟。聰慧明敏。超絕俗倫。無書不讀。無事不知。無所不爲。惟其驕矜傲睨。奢侈靡華。恣意行爲。人所難屈其志。

一日閒暇。偶偕一人。爲侶同行。倏忽霹靂交加。其侶被雷擊斃。彼雖無恙。然其震驚駭異。恐懼慄慄至極。因歷思往事。其心慊然。惶悚恐懼。平日之非。惟有正心誠意。修身克己。以贖往愆。於是定心立志。入院潛修。是夜即投修院。叅謁院長之後。遂嚴切克己。過愈尋常。或有勸其稍寬一二。畧減些微。彼亦不肯少休須臾。嗣後獲領神品。變理教務。

祇因教皇於羅瑪建修

聖堂一座。准一恩赦。給與別會之人。不及於己。心懷不忿。不肯甘服。驕矜嫉妬。聲言教皇。以天主之恩赦。而作人事之仁情。沽恩售義。厚人薄己。實爲不公。遷怒教皇。自撤神品。背逆天主。不認教皇。自稱教主。另闢門戶。遂將聖教歧分。僭名越分。更名重整教。即今之耶穌教。以謂天主之教。年深月久。纖毫不移。以彼智慧。欲將天主久遠之教。更改煥然一新。故名重整教。而以耶穌爲名。遂爾鄙瀆教皇紅衣宰相等。行爲舛錯。差訛。囑昔之宗徒門弟。愚昧頑劣。惟彼一人。智冠古今。學貫天人。言是則是。說非即非。將主耶穌親授宗徒之祕跡。損棄過半。傳遞至今。竟杳然矣。

然彼自損神品。離異修院。遂娶妻完婚。安家落業。貪

花幕色。飲酒暢懷。縱係同教。亦自相矛盾。聳動百姓。首爲亂階。爭城奪邑。稱尊僭號。屢經國王征剿。未遭顯戮。困於囹圄者。十有餘年。每次作書。毀謗天主。頻凌教皇。久病厭纏。臨終之際。尙爾顛狂糊言。詭譎驕詐。嚼舌呃喉。噴血而死。遭罰墮墜。不待言矣。

恩利格係英吉利即英國之王。原其先王存日。其兄爲東宮太子。國之儲君。定配聘於依西巴尼亞國。即今之呂宋國王之女。名喚加大利納爲后。尙未迎娶。其兄蚤逝。兄終弟及。諛臣擁立恩利格爲君。時尙未冠。未冊正后。在廷諸臣籌畫。后乃母儀天下。爲萬民之國母。非幽閑貞靜。溫柔莊正。賢淑之闈範。不可冊

立。其兄前聘之女。賢淑柔順。陪奩浩大。奈有嫂叔之阻革。於是合詞懇恩。祈求教皇憐免。感荷教皇格助孟德垂允。免其阻革。上諭紅衣宰相降臨。降福婚配。於是親迎完配。童子結髮。夫妻偕和。琴瑟永調。生男育女。協合一十八年。長女瑪利亞。乃后親生。是時國王尚欽敬教皇。熱愛天主。聞羅德祿毀主裂教。輕褻聖體祕跡。於是親著聖體要言一冊。恭呈羅瑪教皇御覽。忻悅飭諭。慰樂獎勵。彼復表遜。

其後因偕一妓亞納私通。遂蓄謀不詭。詩云。哲婦傾城。婦人長舌。爲利之階。信不誣也。前者國王與正后加大利納原係和睦效順。然后之爲人。光明正大。一毫不苟。難遂昏王好色之心。亞納妓女容貌艷

麗千嬌百媚阿諛逢迎。買王歡心。致有廢嫡立庶之舉。於是吹毛求疵。千方百計。欲害正后。奈其無隙可乘。只得以其原日之阻革。奏請教皇。冀其垂允離異。而遂慾情。教皇覽訖。思昔阻革幸而允免。成婚已久。縱有大故。難於離異。况夫婦乃天主之定命。列於五倫之首。而從王化之原。權不由己而立。不敢擅自准允。數次請命。俱以定命爲辭。均未鑒允。時有一惡徒。代王

主謀。贊勳其事。遂立惡徒爲其教主。掌握權衡。自作自主。自免自赦。竟將正后廢棄。貶入冷宮待罪。遂立亞納爲后。時正后加大利納。於冷宮修表。上懇教皇。施恩主張。教皇回諭。示后永遠不能折離分異。奸王自此遷怒教皇。暫爾冷淡。及其正后去世。

王復因淫慾之事。不遂其意。將亞納殺戮。而立三妃。亞納無出。三妃之生女。名依撒伯者。是時讐仇教皇至甚。凡係聖會之主。教神父等。在其國中傳教者。悉遭尋故陷害。充配流徒。誅戮起。逐。受害甚衆。

詎料三妃。壽年不永。病而夭亡。復冊四妃。未幾不合本情。復又賜死。重立五妃。其時奸王背主之後。狡魔居心。暴虐凶橫。殘忍刻剝。不按本國制度。無故恃勢凌人。臣下不敢仰視。無人直諫。任性所爲。致因纖介細故。爰定五妃死案。尙未刑戮。本身隨亡。

於是羣臣畢集。籌議國家大計。然且國家有嫡庶之分。立嫡不立庶。天下同然。非惟英國爲然也。觀英國之制度。則與天下殊異也。但係嫡后所生。不拘男女。長即爲

君前之嫡后首生長女瑪利亞。羣臣共議即位。遂爲英國之主。自瑪利亞御極以來。風調雨順。國泰民安。天下太平。百姓謳歌。將爲幹蠱跨竈之主。遂將其父生平所爲。非理之事。概行委棄。上表轉達教皇。代父請罪。以蓋前愆。其時國家規模。朝廷政令。悉皆煥然一新。彼雖女王。然其度量宏闊。胸襟魁偉。親親敬長。仁民愛物。均皆盡善盡美。臣民士庶。莫不感恩戴德。口碑載道。因昔三妃之女依撒伯爲人奸險。詭譎權詐。口蜜腹劍。笑裡藏刀。陰柔害物。國王瑪利亞溫良恭儉。與其有兄弟之情。仁人之於弟也。不藏怒焉。不宿怨焉。親之愛之。不忍親忽手足之情。彼即陽奉而陰違。暗將國王謀毒至死。依撒伯遂自立爲王。竟將

政治規模均皆更易。棄絕教皇。各立門戶。效羅德祿之故轍步。恩利格之覆車。歧分天主聖教。自此愈甚愈遠矣。

加未諾乃法國人。自幼攻讀書史。長即奸詐靈明。爲人心靈性巧。奸宄百出。橫行無忌。不畏天命。狎侮聖賢。及後風聞羅德祿歧分天主聖教。行爲詭譎。自作自主。免受他人轄治。遂亦自稱教主。特具魑魅心腸。無異魑魅行爲。周遊鄉野。徧歷城市。而傳僞教。一日遊至蘇以斯國所屬之一城。其地乃蘇以斯與羅瑪連衝交界。兩國邊疆咽喉之地。人烟湊集。戶口稠密。鷄鳴犬吠相聞。繁華之所。城固濠深。土廣民富。彼入其國。以傳僞教。而收買人心。施恩日久。蒂固根深。遂爾謀反叛逆。逐其官府。殺戮教

類殘虐暴橫。拒城惑衆。士農工賈。稍有不合。忤其私慾。偏情者。即便遭其屠戮。殺人無算。生平兇惡爲人。暮年兇橫暴死。

斯三人者。此固不列於人羣。亦可付之以搏笑。何則。蓋凡生於天地之後。長於稠人之中。處於宇宙之間。莫不感沐天主生養。保存之鴻恩。教育照顧之大德。而思報於萬分之一恩。何也。無非奉其真教。守其誠命。而冀救己之靈魂。獲登永福之域焉爾已。惟其三人。天主賦其聰慧之靈性。因獲自主之權。不知感恩酌德。傲睨自居。驕矜自滿。自尊自大。自負聰明。以爲上天下地。惟彼三人而已。始則奉崇天主聖教。因教皇紅衣宰相。主教神父等。代天宣化。布天主之尊威。剛毅勇敢。嚴勵正大。一毫

不苟。遂不合其私慾偏情。人情看冷煖。世態逐炎涼。以致奸黨藉爲口實。委棄正道。背天主。遷怒教皇。謗宗徒聖人愚昧。言紅衣宰相舛錯。私稱教主。而負己能。自闢門戶。以顯奇才。殊不知獲罪於天。無所禱也。逕被教皇屏除棄絕。逐除聖教外。投入裂教中。然今掌握司牧者。尙敢強詞奪理。妖言惑衆。刊刻僞書。鄙駁聖教。扭捏聖經數言。譏誚聖教行爲。毀主凌人。強挽天心人意。余特稽其所謗各端。逐條分駁。庶使識時務之君子。午夜捫心。揣度前後。則誰毀誰譽。孰真孰假。涇渭自見。清濁自分矣。緣余照其毀謗逐件。不加不減。方免彼教之物議沸騰矣。是幸。

耶蘇教人云。天主教之教皇。主教。神父等。將聖經藏掖。秘匿不傳。不使人見等云云。然彼教總以聖經爲憑。殊不知聖經之有古有新。蓋聖經者。乃上古之時。天主默示列聖先知。預言降生之奧義。以測日後之應驗。未嘗使人以之傳教也。新聖經者。乃吾主耶穌升天之後。宗徒門弟。致有身經目覩者。有耳聞傳言者。觀其奇異靈蹟。特著此以彰吾主在世之行實至異。立表垂訓。以貽後世。流芳千古。非徒令人以聖經爲傳教之憑據也。夫傳教者。乃吾主耶穌。心傳口授。親教宗徒門弟。立七祕跡。赦除罪戾。勸人改過自新。悔罪入教。守十誡命。克七罪宗。熱切愛主。虔誠誦經。不敢畏難而苟安。方爲真正天主教。作耶穌之門弟。

以至生前有望。死後有福。生生世世。不移其志。方稱爲正爲真。况聖經者。非他經之比也。他經未能稱聖。惟古新二約。方稱聖經。乃天主親身經歷。默示傳諭。列聖先知。宗徒門弟。親目所見。親耳得聞。方爾著述。傳衍降生。以前所著者。爲舊約。古聖經。降生以後所著者。謂之新約。新聖經。雖爲諸聖之著述。非諸聖之所能爲。而著述之。實係天主之特恩。降鑒而成也。故使吾儕。珍若拱璧。不可輕棄。縱使瞽盲。愚夫愚婦。朝夕讀誦。不識其中意味。有何益哉。以之示諸文士墨客。誨諭愚蒙。老幼婦孺。使知吾主耶穌行爲至異。古新聖經。前後符合。一毫不爽。已知吾主耶穌。爲真天主。三位一體。而第二位聖子。降生之真實。並非虛假。

捏造之浮言。而信實之。欽崇之。自吾主升天後。宗徒傳教。以至於今。萬國一轍。千古不易。豈似彼耶穌教人。不遵聖令。徒負耶穌之名。不行耶穌之實。豈真耶穌之所教哉。負義忘本。而徒以聖經爲傳教之梯階。強捏數言。搖撼人心。煽惑士庶。徒以口舌爭榮辱。誦吾之教皇。主教。神父等。藏匿聖經。而爲口實。尙爾引論秦始皇焚書坑儒一事。證吾教皇。主教。神父。藏匿聖經之比。然秦始皇焚書坑儒。乃聽信其丞相李斯之言。意欲抹殺孔子之道。而立新教。故有此舉。觀吾天主聖教。特欲抹殺何人之教。焚何書史。坑何儒生。夫古新聖經。是聖道之源。衆教民恭讀。乃聖教所願所命也。惟嚴禁二端。一。禁教民看裂教人所傳

之聖經書。因裂教之書。或添或減。與原本不符故也。教民所看之聖經書。當由主教查閱。准印纔可。二。聖教所禁者。教民隨己本意。亂解聖經。輕講字義。何也。曰。聖經乃天主所默示之書。用意奧微淵博。非庸人俗子所可意解。惟貫通古今聖學者。祈禱多默。而能註講。且聖師之註文。尙須教宗准行纔行。聖教中之人解聖經。務要依教宗所准之本而解之。不依公本而私講。乃聖教之所嚴禁也。如是而行。豈不甚賢哉。是故聖教中萬萬人。衆解聖經者。無不意合公信。萬口一詞焉。不似耶穌裂教中。全無規模。君民士庶。賢愚不肖。均隨口講經註義。彼之所信。此不信之。各說各是。紛紛相爭。竟將天主聖史所述之書。多變爲俗

意人言。不得導引人於天堂之真路。正令人深歎而弔也。

耶穌教人。誦吾教中。懸貼聖像。與十字聖架等。遂曰。天主教人拜偶像。與釋道何異。

殊不知偶者。非偶配之偶也。乃偶然之偶也。至人匪夷所思。偶然而爲之也。像者。似是而非之謂。蓋偶像者。不言不語。毫無作動。祭祀薦歆。而不能領享。日晒雨淋。而不知畏避。向其稽首。不能鞠躬起立。對之問訊。而不知點頭回言。是謂之偶像也。故人以土塑作人身。繪加五綵。立居廟庭。隨意取其名。故曰土偶。人以木彫刻人形。裝束三亭。建設位次。稱爲神道。故曰木偶。人以其土木偶人。由人隨意塑刻。稱其尊號。陞之高座。竟而跪拜尊敬。冀其垂恩降鑒。保福保佑。降吉降

祥。嗟乎。以其至尊至貴。頂天立地。男子。有才有智。聰敏穎悟之
明人。而且尊敬朝拜。於土木之偶像。吾儕諄之。嘲之。崇拜偶像。
良不誣也。彼教竟以吾教之懸貼聖像。及十字聖架。而譏爲拜
偶像者。實屬荒謬之甚也。吾儕之懸貼聖像者。緣自吾主耶
穌升天之後。宗徒聖人。俱各爲主致命而死。世代相傳。遺留其
聖像在世。無非表其致命之誠。聖死之義。畫其形容苦樂之態。
爲人表率。懸貼庭畔。使其闔家老幼婦孺等衆。朝夕出入。常得
瞻視。記憶其聖人聖女之行實苦難。恆羨慕之。常效法之。每切
思之。並非當神尊敬跪拜。而如異教拜偶像之禮也。敬十字
聖架者。緣其十字聖架。雖然以木爲之。乃因原日。吾主耶穌。被

惡人釘死於十字架上。其後十字聖架。屢顯光榮。故吾儕鑄其苦像懸在十字架上。豎在中堂祭台之上。使人早晚得見恆常記其功勞。念其苦難。因爲救贖人罪。甘心交與惡人。不過使吾教中之人。常感救贖之恩。並非如異端而當神供俸朝敬。而禮拜之。豈得謂之拜偶像者哉。彼教云。釋道所拜之釋迦牟尼。太上老君。玉皇上帝。觀音薩菩等像皆是前朝之人。後人刻木捏塊肖之。死物而已。而像天主教拜人手所塑之耶穌瑪利亞若瑟等像。亦是死物等稱。第觀此言。愈加悖謬。莫此爲甚。

請詳觀釋迦牟尼太上老君玉皇上帝觀音薩菩等像。而異教之人尊之拜之。就如神之儼然。如在其上而敬信之。求其保福。

保佑降吉降祥等。不敢懸諸案上。貼諸壁間。恐褻神怒。而致災殃。務要束諸高閣。供諸龕內。早晚香烟。紙燭供俸不絕。或係端公道士。徒子法孫。以其像料。擴充求財之妙具。竊負靈應之明神。與人衝禳追究。修齋建醮。超薦道場。看經念佛。懸旛掛榜。議章定程。聲明價值。經錢若干。佛錢幾何。然後洒掃庭內。懸像迎神。鳴鑼擊鼓。奏樂笙簫。鞠躬拜禱。而爲取錢之方。吾儕雖懸貼耶穌瑪利亞若瑟等像。然不能跪拜朝敬。如有靈之物。不能求其保佑。而索人資錢之謂也。懸貼耶穌像者。以耶穌爲救世之真主。在世三十三年。立表垂訓。及後受難之時。肩負十字架。力劣壓跌。滿面汗血。一婦以白布一方。代主拭抹臉上汗血。

遂印留耶穌眞容在世。使後世之人。觀其像容而思其苦難。世相傳遞。以誌不忘其救人贖人之功。非令人供俸朝拜如其有靈應。而求其保佑也。懸貼聖瑪利亞像者。以聖母瑪利亞。卒世童貞。無玷無污。無染原罪。有大德能。理應留其遺像在世。而爲吾人之表率。兼之生育吾主耶穌。爲天主之聖母。不矜不伐。無詐無虞。在世六十三年。蒙召升天。身靈兼美。吾儕更當觀其儀容。觀其態度。後人雖無德無能。不能效法其行爲。亦當常觀其慈像。而稱羨。褒美其德。恒冀代爲轉達天主之意。無他故也。懸貼聖若瑟之像者。以若瑟乃當時之義人。一生服役聖母瑪利亞。撫養吾主耶穌。奔忙辛苦。爲一代之大忠臣。於耶穌瑪

利亞手中。蒙得至善之死。在世溫良善柔。在天爲人主保。後世繪其圖像。懷抱嬰孩耶穌。使人瞻視其像。而恒學其美德。並非供俸偶像求佑之比也。彼教焉得以異教之邪神。而比並之哉。吾儕並非敬拜其像料。

彼教常云。我耶穌教則不然。所敬拜者。上帝而已。上帝者。天之主宰也。無形無像。無始無終。視之而弗見。聽之而弗聞。非受造之山川人物。可目覩也。等云云。况天主原本無形無像。無所

不在。真無形像可觀。此固理之自然。不待言而知之也。但吾主耶穌降世爲人。以無形無像之天主。而降作有肢有體之世人。立表傳教。既有肢體受難而死。亦猶人也。豈得無像可觀哉。此

言豈不悖謬。更勝萬倍也。

又云。上帝至尊無上之神。豈可

以金水木石等。刻而肖之乎。此言更謬之至極也。况吾主耶穌。親留印像於世。幾及兩千載於茲矣。此一印像。無非收貯於羅瑪金藤寶櫃之中。豈能遍傳天下後世。使人人俱得瞻視乎。故以木作其十字架。以金銀鑄其受難形像。以紙張照繪遺骸。徧普傳天下萬國九州。使人人俱見其遺像形跡。思憶其救世之功勳。以誌其永遠不忘。豈似彼教之徒。恃其伶牙俐齒。毀謗聖賢。強捏聖經。數句微詞。而定他人罪案。豈不甚可哂乎。况聖經乃教人遵守聖令。謹循誠命。虔心事主。默想祈禱。救己靈魂。未聞令人以口舌毀謗於人。以爭榮辱。而定勝負也。

彼又誚吾教寫貼肇造天地人物真主神之牌而拜之。吾僑之寫此牌者。無非使人常見。方知天地神人萬物。皆由天主之制作而成。恒常記念。兼之吾教處於異教之中。不寫此牌。人所難分孰爲奉教外教。故方寫此牌。使往來之人見此。即知爲奉教之人也。並非供俸朝拜片紙數字。而效異教之行。况此牌。並非吾僑私寫。乃係本朝 聖祖仁皇帝所賜。旌揚天主至尊無對。御製書於京都宣武門內。天主堂中。尙賜萬有真原之匾一方。懸掛主牌之上。又賜對聯一付云。無始無終。先作形聲真主宰。宣仁宣義。聿昭拯濟大權衡。掛於主牌兩旁。均係朱裱金嵌。又門外豎牌兩塊。一刻教通中外。一刻學貫天人。八個大字。以

垂不朽。至今猶存。吾教處茲中土之版圖。乃遵崇皇上之上諭聖旨而已。並非自寫自供。故本國乃遵旨而寫。其餘別國亦不寫此牌。以其無帝王之命也。

彼云。天主無形無像。以此毀謗。尙近於理。但吾儕並未修及天主之聖像。何得以至尊之天主。假藉而毀謗於人。使耶穌聖母。及諸聖人。聖女等。亦係無形無像。而遭彼教之毀謗凌辱。理所當受。但若耶穌聖母。若瑟。及諸聖人。聖女。爲有形有像之妙人。遺像垂訓於後世。非若異教拜偶像爲神。卽像爲神之謂也。則明人君子。不待人之苦口辯論。諸君細揣其情。卽知真僞。誰毀誰譽。此情顯然立見也。涇渭自然而分也。吾人免受其簧惑。

鼓舞。捨却永福之域不登。而投於萬禍之所是蹈。故吾諄諄言論。免諸沉淪可也。

耶穌教人論吾教赦罪之非。強拉聖經爲據。云耶穌臨世救罪人。既稱耶穌臨世救罪人者。特以耶穌臨世立七祕跡。而作救人之妙藥。彼教捨棄諸祕跡。而徒以誑言爲救罪。不知又將何以作救罪人之良方哉。又言耶穌之血滌除諸罪。未言

耶穌之名。卽能滌除諸罪也。

又云我若任罪。上帝公義。言

出惟行。將赦我罪。滌我愆尤。

卽云任罪者。乃係身任而負荷

也。吾儕惟有自認己罪。而求赦於主教神父。惟主教神父方能荷我衆之罪而降赦。身任其事。而代天主赦罪之權。吾儕則不

能泄其任也。又云滌我愆尤。蓋滌者乃洗滌也。倘非神父主教等代天主宣化。普施洗滌。捨此又將何以滌我愆尤哉。彼教強扭聖經。徒恃口舌誣人。而不揣情度理。悖謬甚矣。待吾細將聖經。耶穌行爲申明。以分真僞。吾主耶穌三十歲時。領洗於若而當河。受洗於若翰洗者。現在聖經瑪爾谷第一章七節云。若翰言曰。後我來者。更勝於我。即屈而解其履帶。亦不堪焉。第八節云。我以水施洗。而彼將以聖神施洗爾也。第九節云。時耶穌自加利勒亞納匝勒邑。至若而當河受洗於若翰。第十節又云。由水而上。見天開。有聖神如鴿降臨其上。自天有聲云。爾乃我愛子。吾所喜悅者。又理竇第二十八章。第十八節云。耶穌前

謂之曰。天地諸權。已與我矣。第十九節云。爾往招萬民爲徒。以父子聖神之名施洗。第二十節又云。教之守我所教爾者。且我常偕爾至世末焉。以此而論。聖經教人用祕跡赦罪。未嘗教人但會說話。即得罪之赦也。

傳教三年。彼時耶穌尙存有捫其裾者。有以眼淚洗主之足者。因而獲赦。此雖不由領洗。實獲捫耶穌衣裾。將眼淚洗耶穌之足。方能獲罪之赦。自耶穌受難復活。在世立諸祕跡。傳授宗徒門弟。施洗傳教。招萬民爲徒。立聖伯多祿總理教務。遂當衆升天。况吾儕乃肉體。凡胎負有原罪。若非仗領洗得耶穌所立之功勞。何以瑪爾谷之一章八節云。我以水施洗。而彼將以聖神施洗爾也。等云。詳觀此言。

原本出於聖經。彼教猖言。以聖經爲憑。不必領洗。單信耶穌。即得罪赦。此言由何所見。而爲此言。吾想古新聖經各處。均出一轍。莫非彼教。又另設一聖經。而不與此聖經符合乎。蓋自耶穌升天之後。而世之奉天主教人。領洗有三致。有水洗。火洗。血洗。夫水洗者。乃效吾主耶穌之親立祕跡。以父子聖神之名施洗也。火洗者。以切慕實領水洗。仰仗耶穌救贖之功。而發上等痛悔。因而能獲其罪之赦。血洗者。以其人被異教官長之凌辱。甘心爲主樂受窘難。致命而死。即獲天堂。謂之血洗。自古歷今。幾及二千年。凡係世人未領此三洗之一者。必未能升天也。彼教又以耶穌被釘十字架時之二盜爲言。其一盜未嘗領

洗而獲罪赦。則是不領洗之明證也。此非明人之言。想是日耶穌被釘於二盜之中。其左盜詈主。右盜謂耶穌曰。主。歸爾國。祈憶我。耶穌曰。我誠告爾。今日爾必同我到樂園矣。此盜本未領洗。而得與耶穌同享樂園。蓋斯時。此盜親聆吾主聖言。而赦其罪。故不待領洗。而能獲罪之赦也。是以耶穌教中。亂言不領洗者。尚可得罪赦。殊知耶穌赦右盜之罪。乃一時一人之事。非吾主所爲。以立萬世萬人之規模也。蓋耶穌謂宗徒曰。爾等往天下。招萬民爲徒。施洗之。因父及子及聖神之名。信而領洗者。必救靈魂。信經又云。我信惟一洗。以得罪之赦。此必世世人所當信。當爲。纔可升天也。異教中人。信識天主。願得罪赦。升天

堂。必須領洗。倘在臨終不能領洗。當盡心痛悔平生之罪。切願領洗。此際不實領洗。出不得已。故天主以此人之願洗爲實。而赦其原本諸罪無疑也。右盜被釘於耶穌之傍。耶穌欲救之。使人人知道罪惡雖重而不可失望。乃默照其心。認識吾主爲天主的聖子。悔罪求赦升天。耶穌神目鑒其悔心。親耳聞其哀求永福。便親口應之許以天堂。何也。曰。此時救世主未死。古教未廢。新教未興。耶穌或以古教之禮。引盜賊痛悔而赦其罪。亦未可知。或者以新教之禮。先默示其心切願領洗。而即以其所願之洗爲實。而赦除其罪。亦未可知。却此屬私事也。不反乎吾主公旨言曰。爾等往天下招萬民爲徒。施洗因父及子及聖神之

名。信而領洗者必救靈魂。

又言以水洗人爲何不以水向

街市之眾人。概施洗禮。使皆入永生之國。此真不知分量。病

狂瘋癡之糊言矣。何則。蓋領洗者。實係奉教之人。認識天主。熱切守誠。虔誠誦經。勤學要理。察其爲人。方能付洗。豈得糊亂以水洗人。而輕褻主立之祕跡。毀謗真實之罪大矣。

傳耶穌教者云。教皇主教神父皆人也。不能赦罪。能赦罪者。惟天主耳。此言固真。並非虛謬。譬如今之皇上。統率臣民士庶。而主生殺之權。設人有所犯。當赦當殺。必由皇上。親身經理。不惟輕褻至尊之位。至必天下之廣。兆民之衆。豈能盡數而理之乎。無非設立撫藩臬道府州縣丞。有司等官。代其經理。皇上垂

拱而治。亦猶吾主耶穌之以祕跡授諸宗徒。鑒牧鐸德。統理教務。而授洗於人也。彼教所言之彼得。即吾教所稱之伯多祿也。伯多祿原名西滿。乃吾主耶穌親改其名爲伯多祿。猶言磐石也。故主耶穌云。我將建我會於此磐石上。蓋主耶穌逕以伯多祿爲聖會之基址。而立其爲聖會之首。廣傳聖教。正位羅瑪。爲神統之京師。理天下之教務。各國各方治設主教神父。分理其勞。蓋自耶穌之後。乃伯多祿爲教化第一之總皇。至今二百餘代。相傳無二。幾二千年綿綿不絕。更無他論。惟前數百年來。有羅德祿。恩利格。加未諾等。三人叛違教皇。而遭天主棄絕。教皇以慈悲爲懷。寬宏大度。不與之較量。乃容忍不言。而今之主教神

父。焉有不遭其徒之毀謗哉。吾輩奉教數十年來。知識淺鮮。觀此難忍。爰將七跡。逐端分清。庶免物議。真偽概可立見矣。

二、堅振。夫堅振者。乃吾人之領受聖神於心也。堅固信德。壯其膽力。俾致有剛勇。抵擋世俗魔鬼肉身三仇。而勝其誘惑。不惟吾儕咸當領受聖神。至於吾主耶穌。乃救世之主。於若爾當河領洗之後。亦領受聖神。瑪爾谷第一章十節云。由水而上。見天開。有聖神如鴿。降臨其上。自天有聲云。爾乃我愛子。吾所喜悅者。由此而觀。吾主耶穌以天主之尊。尙受聖神。况吾儕乎。又使徒行傳第二章一節云。時維五旬門徒咸集。惟一心。二節云。忽自天有聲。如奮迅之風。充滿座室。三節云。遂見火焰如舌。歧止。

各人頂上。四節云。衆感聖神。詳觀聖經之言。非吾輩私立。乃學宗徒之爲。自吾主耶穌升天之後。而宗徒門弟。未受聖神之先。乃畏懼惡人。共避於一室。默想祈禱。等候聖神降臨。不敢聲張。而他往。至旬日昧爽。宗徒門弟。領受聖神之後。膽力堅壯。能通萬國言語。隨後可散往各方傳教。是日聖伯多祿講論道理。即便奉教者三千人。次日再講。認識天主者。五千人。可見堅振祕跡。爲吾儕之不可少也。夫云堅者。硬直也。堅硬其心。而如金石之謂也。宗徒親從耶穌。遂獲耳提面命。心傳口授。令其躬傳聖教。刻間聖神未降。尙且畏懼不前。至於聖神一降。迅即分身傳教。可見吾儕。欽崇天主三位一體。認識吾主耶穌。處於窮鄉僻

壤異教人中。若非仗有堅振祕跡。而領受聖神降臨。充滿其心。焉能自仗本身力量。克勝三仇之誘惑哉。非惟吾儕爲然也。矚昔吾主耶穌。領受聖神。而往曠野守齋。抵擋魔鬼誘惑。而後招徒傳教。宗徒亦領受聖神。方敢講道勸人。然主耶穌以其祕跡。親授宗徒。遺流後世。領其聖神。堅其心德。壯其膽力。抵擋魔鬼誘惑。克勝世俗虛華。押扶肉身私情。庶乎不謬。由此而推。明人君子。不待言而自知也。但察真耶假耶。豈不共諒之哉。

三論告解祕跡。所謂告解者。乃吾人自訟自呈。自告己罪。而求天主垂憐赦宥以解之也。故告解又非洗滌之比。洗滌所赦之罪。人所不能犯。乃由原祖犯罪之後。方生兒女。凡吾儕之秉父

精母血。由人道而生者。自天子以至於庶人。不能獲免原罪之污。故一離母腹。方生下地。不知犯罪。遂迅速領洗。不可遲延也。何則。蓋原罪。人本不能自犯。乃於母胎所染。故出母腹。即便領洗。方爲妙舉。倘若吾儕。中年奉教。自身負有原罪。更兼又犯本罪。務宜學道理領洗。故云。洗滌能赦原本二罪者。卽此之謂也。凡領告解祕跡者。乃吾儕奉教。而獲領洗之後。本身一舉一動。所行所爲。自犯之本罪。倘未領洗之前。則仗領洗而赦。旣領洗之後。非由告解祕跡。將何以獲罪之赦哉。故吾儕奉教人。領洗之後。早晚之行爲舉動。宜當恆存於心。每年必當懇求本堂靈牧。至少告解一次。若逢機會之便。則多多益善也。故吾儕每當

臨解之際。宜自省察。本身行爲。自訟自呈。於靈牧台前。不加不減。認明己罪。懇求宥赦。本牧以吾主耶穌親授之權。而放赦。又當察其罪之輕重。而定補贖。此主耶穌親立之祕跡。並非主教神父自立。而引誘平人。耶穌教人。謗我主教神父。解罪之妄。而引聖經大闢王之言云。我罪我承於上帝。我愆亦不隱兮。我云將認我愆於上帝。上帝則赦我罪之辜兮。詳觀此特古聖經之言也。其時聖子未降。人皆引領仰望至極。大闢王卽達未聖王。然而達未聖王悔罪之言甚多。非一而已。所作聖咏。不一而足。縱欲解罪。無由得解。且耶穌未降之先。無數古先聖人。俱不能直升天堂。皆集於靈博獄。專望救世之主降來。方獲升天。故非

仗耶穌將來受難之功。雖痛悔無由得赦。雖得赦亦無由上升。必待耶穌受難。而靈魂降古聖所。安慰古聖。後至升天之時。挈帶古聖一同升天。此際天門方開。故大闢王之言。時有不同也。故聖經聖瑪竇第十八章十八節云。我誠告爾。凡爾繫於地者。在天亦繫之。釋於地者。在天亦釋之。十九節云。我又語爾。倘爾二人契合於地。則不論何求。我天父必成之。又第十六章十八節云。我又語爾。爾乃伯多祿。我將建我會於此磐。而陰府不能勝。又十九節云。我以天國之鑰賜爾。凡爾繫於地者。在天亦繫之。釋於地者。在天亦釋之。卽觀此聖經明言。吾主耶穌以其赦罪之柄。授諸宗徒。而傳永遠。宗徒授諸主教神父。代主宣化。以

主耶穌親授之權柄。方能代人赦除諸罪。乃遵主之聖令遣使也。耶穌教人訕謗主教神父赦罪之非。乃刊書謗毀云。赦吾罪者誰乎。神父歟。非也。上帝也。人則不能赦人之罪。主教神父藉茲以漁人之利耳。觀彼教此言。謊謬至極。殊屬不經。何耶。蓋吾之主教神父。由歐羅巴洲極西之地。修真養性。舍生成仁。恭奉教皇之慈旨。歷九萬里之程途。經噬人掠人之國。到吾中國。自備資斧。勸人行善。改悔自新。未嘗衣人之衣。食人之食。一毫不取於人。何云漁人之利也。倘似他教之行爲動彈。輒使人出錢買辦供養。買物放生等情。方謂漁人之利可也。伊等獲錢而養其身家性命。肥家利己。損人多矣。吾之主教神父。愛民如子。不

忍斯民。蹈諸陷阱。罹諸危險。故主教三年一巡。本堂神父。一年兩次。總以善言教導。諄諄誥誡。勸其維新。瀝盡心血。苦口善教。至於解罪一則。神父乃代主耶穌之位。陞堂正坐。吾輩男者。揭帽。女者遮容。自訟自呈。神父遵主耶穌之聖言。觀吾輩行爲之重輕。善言勸改。定補贖。而放赦。此古今一轍而已。此乃吾輩親歷。並非過耳之言。又有何利可漁哉。彼言赦罪者。上帝也。其言不謬。蓋降生以前。信天主而切望救世之恩者。犯罪若痛悔而虔祈仁主赦之。定然獲罪赦。但死後不能見天主。惟歸古聖所。迨至吾主耶穌復活後四十日離世。偕其升天。此乃古教之道。古人行之可矣。然彼一時也。此一時也。天主的聖子降生。既廢

古立新。余輩須棄古從新也。却讀聖經。明知耶穌以已赦罪之權授諸宗徒。憑聖傳。即知宗徒授其神權與他人。而世世未絕。是故余輩尋繼宗徒神權者。教宗。主教。神父是也。跪膝其前。自告已罪求赦。且蒙聽告解者。放赦。而復獲天主聖恩焉。或曰。據前言。耶穌將已神權授諸宗徒。敢問是言何憑。曰。瑪竇十八章。十八節。吾主耶穌謂宗徒曰。凡爾等所釋於地。在天而釋之。所繫於地。在天而繫之。則吾之主教。神父。代耶穌之位。勸人奉教。然則神父赦人之罪。而天主亦必赦之。倘神父不赦。則天主不赦。必也。安似耶穌教之人。而徒以耶穌爲名。將教歧分。不用祕跡。而能獲赦。則世之人。惟以耶穌之教爲名。生平不肯念經悔。

改。獨稱爲耶穌教人。罪即得赦。則耶穌更不必招徒貽訓。單釘十字架代人贖罪。一贖之後。不必再贖。何以未釘之先。以水洗濯宗徒之足。而喙痛告補贖。復活之後。更不必立伯多祿爲聖會之首。廣傳聖教。彼教以聖經之言。被釘於木。親身當吾之罪。因他受鞭撻。爾則得痊。何以伯多祿爲聖會之首之基。因何彼教。又不認伯多祿爲首爲基。今之教皇。乃古之伯多祿也。代代相傳。彼教歧分耶穌之教。而叛逆伯多祿。即係異邦之人。化外頑民。非天主之肖子。乃羣魔之狡童。尙敢稱耶穌釘十字架盡贖人罪。似乎彼教之行爲。則古今之人。不必奉教認主。不必誠心向善。但稱耶穌教人。一總俱得罪之赦也。又何必區區勸人

行善而講福音。豈非言行相違。前言不符後語。此不待分駁。而即知彼教之詭譎詐僞也。

耶穌教人。譏吾聖教。念經免罪。以爲汙耶穌之真道。彼教不然。乃唱讚美詩。不行念經祈禱。況吾儕之念經者。凡人認識天主。譬諸世俗人子之事父母。孝子事親。必早晚問安。晨昏定省。以盡人子之道。吾儕奉教。早晚讚美天主。而求日用之需。冀赦生平之罪。常日早晚祝誦。主日通功而守。況所念之經。考諸聖經。乃吾主耶穌在曠野講道。宗徒門弟悶倦。吾主特教之以祈禱之法。而免受諸誘惑。故云。在天我等父者。我等願爾名見聖。爾國臨格。爾旨承行於地。如於天焉。我等望爾。今日與我。我日用

糧而免我債。如我亦免。負我債者。又不我許。陷於誘惑。乃救我於凶惡。亞孟。此經乃係吾主耶穌傳教之時。親口傳授宗徒。祈求在天之主。赦吾罪戾。恆常祈禱。免受諸惡之誘惑。恆存於心。而加勉。此吾主在世。親教宗徒善禱之法。何況吾主升天而去。豈不早晚念經。而恆常祈禱。望得罪之赦哉。此乃天主經。又有聖母經。申爾福瑪利亞。滿被聖寵者。主與爾偕焉。女中爾爲讚美。爾胎子耶穌。並爲讚美。天主聖母瑪利亞。爲我等罪人。今祈天主。及我等死候。亞孟。此乃天神預報朝賀聖母之言。及聖婦依撒伯讚美聖母之詞。並聖會所添之言。吾儕以之祈求聖母寵佑。轉達天主。其餘則宗徒信經。並各祝文。均係祈禱之法。

善祈禱者。不在乎經之多少。惟在心向天主。故主耶穌有言。倘爾二人契合於地。則不論何求。我天父必允之。觀聖經之言。所求必得。縱使不得。亦不可不求。豈得似彼教。而徒以耶穌爲名哉。吾等念耶穌親立之經。尙慮難獲必成。而彼教唱讚美之詩篇。乃古先聖人唱讚之咏。古先聖人尙賴吾主耶穌挈帶。方獲升天。而彼教徒唱此詩篇。而遂能獲罪之赦哉。倘如此獲赦。則世人不必存心向善。同乎流俗。合乎汚世。毀聖謗賢。三妻四妾。淫惡滔天。而欲以聖經數句之言。取悅於天。掩其不善。而著其善。觀彼言語。如見其肺肝然。則何益矣。彼教徒負耶穌之名。而不行耶穌之實。恐不能入永生之門。而墮永苦之獄。諸君各宜

自愛。切勿棄真就假。而遭永遠之罰也。各宜自思之。

四論聖體祕跡。夫聖體者。乃吾主耶穌之活身活血。吾主將離世升天。特立聖體祕跡。自藏於餅酒模樣內。使雖不露已真形。而實恒住於聖教之中。使與吾輩同旅於此竄流之世。使成補養靈魂之活糧。善領者有神力。能勝諸仇。幸詣於常生。故吾主耶穌受難之前夕。使門徒治備巴斯卦筵席。命宗徒列坐。而先以水洗濯宗徒之足。此特明表奉教之人。宜先告解清潔。方可獲領聖體。故主親洗宗徒之足。然後取餅祝聖。賜諸宗徒。故善領者。獲益無限。冒領者。負罪匪輕。故聖經瑪爾谷第十四章。第二十二節云。食間耶穌取餅祝而擘之。予門徒曰。取食之。斯乃我

身焉。二十三節云。又取杯祝而予之眾飲。曰。此乃我血。即新約之血。爲眾流者。然而耶穌此舉。聖路加第二十二章十九節。二十節。言亦如此。又聖若望第六章。五十二節。亦詳言之。又聖保祿達哥林多人書。第十一章二十三節。至二十九節。概爲明言。可見領聖體。爲吾奉教人第一緊要之關節。不可輕忽。故諸聖經。鑿確明言。並非主教神父臆造之微詞也。詳稽聖體祕跡。亘古迄今。奉教之人。上自天子。下至庶人。凡懷疑聖體爲不真。則主耶穌即顯聖容。以示之者。屢也。即今塵寰之眾。省察精緻。解罪詳明。廉潔領其聖體。使吾主耶穌。恆存於心。而爲養活靈魂之神糧。以堅其善志。稍有冒領聖體。踐踏祕跡。則主遠離。而使

狡魔鑽心。誘其行爲乖舛。善惡顛倒。詳觀十二徒中。如達斯賣主自縊。此即冒領聖體之明證也。吾儕豈不勉力從事。虔心預備。恭領聖體。而效彼耶穌教之人。毀聖謗賢。獲罪於天主。名則恭奉耶穌之教。其實乃踐踏凌辱耶穌之教。言則以聖經爲憑。實則與聖經相反。莫此爲甚。豈是吾主耶穌立教之意。而其心之所欲也哉。

五論終傳祕跡。夫終傳者。亦乃吾主耶穌親立之祕跡。乃爲奉教之人。常得善終之恩也。如昔大聖若瑟。於耶穌及聖母手中。而蒙得至善之終。今善領終傳者。亦望畧似彼之善其終也。故主耶穌立此祕跡。授諸宗徒門弟。傳教於普天之下。億兆人中。

但能欽崇天主。認識耶穌。熱切仁愛。謹守規誡者。俱皆獲領終
傳。而得善終之恩。聖會付以終油。赦其生平遺忘之罪。而輕其
病體。故聖經雅各伯書。第五章十四節云。人或遭疾。當請鐸德。
托主名。以膏膏之。代爲祈禱。十五節云。篤信而祈。得主醫之。疾
可瘳。雖素有罪。亦蒙矜宥。十六節云。宜各自言其罪。代之祈禱。
以望疾瘳。蓋義者。勤求無己。獲益不淺。詳觀聖經。侃侃明言。確
確有據。並非吾教之臆造。乃遵循聖經之遺訓也。耶穌教之人。
動輒即論聖經。乃敢相反諸聖之明言。悖逆耶穌之真道。有聖
經之名。而無聖經之實。污穢耶穌。獲罪多矣。可不戒哉。
六。論品級祕跡。夫品級者。乃論人品之優劣。行爲之端正。作事

之準繩。處己之邪正。待人以寬。任人以和。守己以嚴。臨事不苟。方由邇而達遠。從卑以登高。步下升上。猶殿之階級也。故謂之品級。即如在天之使神。朝廷之官階。均有九品之尊榮。凡事不由品級而上。烏乎可而分次第。以別尊卑也。故主耶穌選擇宗徒十二位。方立聖而公會。廣傳聖教。人人俱係門弟。孰長孰幼。由何而別。个个均屬宗徒。誰大誰小。自何而分。焉有品級之次序乎。然主耶穌傳教之際。每謂伯多祿曰。爾乃伯多祿。我將建我會。於此磐。而陰府不能勝。乃聖瑪竇第十六章十八節之言。又十九節云。我以天國之鑰。賜爾。是即耶穌在世。立品級之明證也。詳稽聖經。耶穌受苦難後復活。在世四旬。講論天國之奧。

義立聖伯多祿爲聖會之首。總攝教務。正位羅瑪國。是即品級之實事也。神品非比官品。考其爲人端方。形靈兼美。處身廉潔。有爲有守。無詐無虞。不貪不吝。愛主愛人。方授以神品。而經營聖會之要務。故自聖伯多祿以來。相傳二百餘世。莫不由德行而履歷神品。而分次序。是品級之不可紊也。故吾之主教神父。均由神品而陞。非官品之比也。吾儕不得而知。故聖保祿達提摩竇第一章第六節云。我素接手。錫爾天主賜恩。我使爾追憶如火復燃。觀此則聖保祿蒙天主默示。以接手而錫天主恩賜。是即聖品級。而錫神品也。官階有尊卑。神品亦有上下。故耶穌教人。竟將祕跡損棄。而彼又何分牧司。而主傳彼之僞教哉。誰

毀誰譽。於此概見矣。

七論婚配祕跡。夫婚配者乃初婚男女結髮。配爲夫婦。同偕到老。琴瑟調合。相愛相親。而如一人。傳生兒女。以繼宗祧。而立人倫。故天主肇造天地。首重人倫。以黃土先造原祖亞當。然後取其肋骨。造成祖母厄娃。將其一男一女。配爲夫婦。傳生人類。故夫婦爲五倫之首。先有夫婦。而後有君臣。父子。兄弟。朋友。世代傳衍。迨主耶穌立爲祕跡。凡人之受領婚配祕跡。是爲童子結髮之夫婦也。由少至老。同心同德。共生兒女。永遠不得分離。故聖經聖瑪竇第十九章第四節云。耶穌曰。造化之主始造男女。五節云。故曰。人離父母。膠漆其妻。成爲一體。此經汝豈未讀乎。

六節又云。如是終不爲二而一體矣。故天主所耦者。人不可分之。觀聖經耶穌之言。是以婚配爲人倫之大事。凡屬夫婦。卽係天主所配之耦。非爲繼世而立。乃天主創造人類。卽定此婚配之常倫。苟有棄妻而他娶者。是行淫也。背逆天主之所耦。故夫婦之倫。列於五倫之首。等閑不可離異休棄。至于天主之義怒。倘人生斯世。不遵天主之定制。男女苟合。是卽不立於人羣。又與禽獸奚擇哉。故天主始立婚配。首重人倫。以一肋造人。而成配耦。六躉化酒。以顯全能。故由天主降至。耶穌尤重於夫婦之倫。故聖會遵主制。而從王化。凡係奉教。嚴禁異端。男女請命。而定婚配。主教神父。察其停妥恰當。方邇降福婚配。稍有不妥。卽

當慎之於始。以免悔之於終。而亂天主之定命。以辜耶穌之祕跡。故當男婚女嫁。父母宜當仔細。不可忽畧。聖會亦不能徇情偏護。以乖夫婦之倫。故婚配恰當。宜爾室家。樂爾妻帑。是聖會以夫婦之倫爲重也。設使夫婦之倫有乖。則路斷人稀。後世之欽崇認主者。鮮有其人矣。故夫婦之倫雖重。而其貞靜之德愈尊愈貴。而冠乎夫婦之倫矣。人豈喋喋便便。而誚吾之主教神父者哉。

耶穌教之人。譏吾主教神父貞修之德。刊書訕謗曰。天主教之主教神父等。以娶妻爲禁。蓋上帝太初。造人一男一女。原以配爲夫婦。故男以女爲室。女以男爲家。然後子又生子。孫又生孫。

後以繁育其嗣續焉。然此固人之當然也。殊不知男女居家承宗繼後。爲可貴。然其清心寡欲。洗心滌慮。尤更可貴。於男女居室之尤尊也。故天主始初造人。以男女配合。而生人類。人類即繁。而至淫慾太甚。天厭絕之。遂降烈火。殄滅五府淫城。闔城盡燼。惟剩一祿德而已。闔郡之人。悉淫野合。男色女慾。聚麀無度。故遭顯罰。惟一祿德守已以正。待人以嚴。夫妻以禮相接。得主嘉獎。後人方知貞德之愈貴也。故人生斯世。男情女慾。誰人無之。然其有夫婦之樂。亦必有貞信之守。觀其貞信之守。尤難於夫婦之樂也。然其夫婦之樂。日則同室而居。夜則共榻而眠。自婚至老。快樂生平。生男育女。以娛暮年晚景。此世人之自然也。

智愚賢不肖。均有室家之累也。此乃夫婦自然之理。又何難之有哉。至於貞靜潔烈之德。則譬諸天神。至潔至淨。一塵不染。原其本於天堂。常伴天主。遵主使命。承行主旨。心無妄思。意無妄動。故其永遠常潔。又非塵世貞德之比也。凡人生於天地之間。處於塵寰之上。有塵慮縈心。世情關目。觀人間夫婦之樂境。觀家庭弟兄之快暢。有世俗肉身之擾。兼狡魔邪誘之累。日夕收束。早晚拘持。非一朝一夕之故態。乃頻年頻月之銳精。自幼攻書立志。苦守熬清受淡。孤眠獨宿。棄諸樂境。撇諸繁華。不貪世福。不羨榮耀。以普天下爲室家。以救靈魂爲己任。挑而又挑。選而又選。方受神品。而爲神父主教。教育人才。訓誨愚蒙。樂以忘

憂。因無室家之慮。缺少內顧之憂。傳教天下。隨方顯化。代天宣行。

故聖經有云。欲爲督會。慕善職也。督者。當無間然。謹己以正。待人以寬而柔遠人。普施聖道。嚴理其家。善治其子。不善施教。家不克齊。焉能理會上帝乎。又聖保祿勸提多曰。我留爾在革里底。以正其缺於諸邑。舉任長老。依我所命。必若無可責一。其妻子女宗教。則可備以職會。督必無間然。爲上帝冢宰。耶穌教觀此聖經。即言被時主教神父。無不娶妻生子。如常人之行然。遂責當今鑒牧司鐸。不娶妻。便犯宗徒初立之教規。殊知可責者。非吾主教神父。乃耶穌教人。不明悉聖經之義。而任意亂講。聖

保祿之時。新奉教者多。主教神父少。是故常取俗人。而陞之爲
鑿牧司鐸。推擇獨妻之明士。善於理家教子。使教類感其德而
服其治。陞主教神父之後。必與妻室分房。不再同宿。聖保祿所
囑提多之意。不外乎此。與吾主教神父之不娶妻。何干彼教徒
以數句聖經之微言。即欲誦吾主教神父守貞之德。故聖經聖
瑪竇第十九章。十二節云。蓋有生而閹者。有被人閹者。有爲天
國自閹者。此言惟能受者受之。觀此乃吾主耶穌預言守貞之
美也。蓋有生而閹者。其人生而癡蠢。畧無知識。亦如閹人也。有
被人閹者。即今世之宦豎。被人閹割。而爲太監也。有爲天國自
閹者。此言惟能受者受之。是即今之主教神父也。自願守身貞

修不婚不娶。立志真誠。代天宣化。並非他人強之而行。聖經已詳言之也。故聖保祿達哥林多人前書第七章。第二十五節。至四十節云。論及童身。吾未奉主命。惟沾主恩以爲忠。自言己意。我憶今時之災。惟守我素爲美。蓋既娶無棄。未娶無求。娶無尤。但若輩身遭難。吾不復爾責。兄弟乎。吾言今而後窘逼之時也。故有妻者。當如無妻。哭者當如無哭。喜者當如無喜。買者當如無得。處世無妄費。蓋變遷者。是故我欲爾無所慮。無妻者慮主之事。如何悅主。有妻者慮世之事。如何悅妻。婦固與處子異。無夫者。慮主之事。欲其體其神成聖。有夫者。慮世之事。如何悅夫。吾言此爲爾益。非欲陷爾。乃使爾盡其所當然。以殷勤事主。心

無紛擾。若有人思不嫁處子爲恥。年踰及笄。事有可行。則隨所欲嫁。亦無尤。如其堅心。事無所阻。得行其志。定意不嫁之爲美。如是嫁之者美。不嫁之者尤美。夫在。婦爲夫法所繩。夫死。婦脫夫法。任所欲嫁。惟宗主者乃可。我意不嫁幸甚。我思所言。感於上帝之神然也。夫據聖保祿之言。前後俱以守貞爲可貴。何守貞之貴於夫婦也。夫婦乃人生之常事。無分智愚不肖皆可。宜爾室家。樂爾妻孥。惟貞德之難守也。克諸私欲偏情。三仇之難勝也。豈特輕易守身。而至於主教神父之任也。彼教又云。古之主教神父。便可娶妻生子。今之主教神父。獨不可娶妻生子乎。吾觀此言。實非智者之言也。凡自宗徒而下。不知有幾位主教。

娶妻。幾位神父娶妻生子。則吾儕不得而知。倘若主教神父能
够娶妻生子。則必經營勞碌。以作養妻活子之計。豈有樸樸風
塵。離鄉別境。而善顧他人乎。惟聞耶穌教之牧司。娶妻生子。雖
云傳教。身負資重。並未見其勸善幾何。闢教若干。惟有聚斂蓄
財。養家活口。以謀生計。不知責己。而反責人。負愧殊深。倘似吾
輩之主教神父等。則隨處宣化。教友林立。其如天下之萬國崇
教。吾方耳聞。未獲目見。至吾中國一十八省。各府州縣建修堂
皇。仕宦鄉愚奉教者衆。豈似彼教素未闡行。而徒以口舌爭勝
負。而彼復將釋道不婚不嫁。而喻吾之主教神父。冰清玉潔。素
無青蠅之玷。釋教雖云修真養性。打坐參禪。住於寺廟之內。以

梵宇爲巫山。將空門作孽鏡。引誘良家婦女。拜佛進香。留宿強姦。宣淫無度者有之。道教縱言燒丹煉汞。畫符施水。明爲騙魔逐鬼。實則藉滋烝淫。常娶三妻四妾者有之。休道吾之主教神父。專意事主。不貪不淫。至於吾輩奉教之人。惟遵天主之定命。一夫一婦。殊非彼教之聚磨烝淫者哉。

論齋素一節。耶穌教人云。天主教人。以茹暈爲禁。與釋道何異。不亦重飲食。而輕真道哉。噫。上帝之命令不守。而守人捏造之說。何以爲從道之徒乎。第觀此言。而彼教專以聖經爲憑。而不本乎聖經。強詞奪理。殊可慨也。稽聖經瑪竇第四章二節云。耶穌禁食四十日夜。又瑪爾谷第二章十八節云。若翰門徒呿喇

噉人禁食。或就耶穌曰。若翰門徒呿喇噉人禁食。爾門徒不禁食何也。耶穌曰。新娶者在賀。娶者安用禁食乎。蓋新娶者尙在無庸禁食矣。惟將來新娶者別之去。乃禁食耳。此乃聖經明言禁食之事。本乎聖經。蓋耶穌曾在曠野守齋四十日。乃立表而垂訓於後世。致使後世之人遵之效之。方稱耶穌之真門弟。故斯時耶穌以新娶者設譬。蓋新娶者乃主耶穌也。耶穌現在。勿庸禁食。新娶者別之去。乃禁食耳。此明表耶穌升天而去。吾人當效之而禁食耳。故吾教之禁食。恆守耶穌之聖令。非如他教之久持長齋。除酒斷葷等情。吾教之限定日時者。乃敬吾主耶穌。將近受難之期。吾儕感其救贖之恩。荷其生成之德。恆存於

心不忍貽忘。亦非持齋把素。不過畧減厚味。免壯私慾。偏情守候。復活瞻禮。而仰望之。尊敬之。況主耶穌。爲救人贖人。甘罹慘刑。吾儕奉其教。遵其聖令。耶穌傳教宗徒。貽流後世。無相遺忘。其非一己之私。實爲聖會之至公至義。徧普聖會。萬國同然。彼教云。食之何損。不食何益。故知食與不食。無甚損益。惟存諸心於義何損。孟子云。雖有惡人。齋戒沐浴。亦可以祀上帝。彼教誦吾教。限定日時。以爲人所捏造。不當定限。彼教稱云。吾教禁食。與聖經相合。不拘何地。不限何時。隨各人之意。與各人所值之事焉。非他人所能預定也。觀此即知。爲人所捏造必也。何則。彼教禁食。不由定規。隨人所喜。貪妻戀子。今日不便。而許明日。明

日不閑。又推後朝。豈不將其事主之事。而作孩提之戲。此特井底之蛙。管中之見。不行責己。而反責人。吾儕乃守天主之定規。不過畧減厚味。食蛋食魚。常食豬膏。並非齋素。無非減節。而清心寡欲。每七日。惟以瞻禮六七。稍減其味。尚用魚蛋。餘日則任食掠而餐。亦無害於事。又何似異端之齋戒哉。或爲父母先亡之生年。死月。彌月。期年。減節而守。爲之祈禱。天主寬宥其罪。稍存人子之心。烏能甘受彼教之訕謗侮辱哉。

論敬聖母瑪利亞。耶穌教人云。天主教稱瑪利亞爲聖母。可代求於上帝。而敬拜之。不知操賞罰之權者。乃上帝。非瑪利亞也。噫嘻。彼教何以出此無父無君之言也。待吾畧舉大概言之。以

彼教之言瑪利亞人也。不當尊稱。而吾主耶穌亦人也。彼教又烏得而敬之乎。此實無父無君。目無皇章之人也。枉披衣冠。立於人世。夫聖瑪利亞乃聖亞巴郎之裔。達味聖王之嗣。未有天地之先。天主特預簡其爲母。賦大德能。爲諸德之明鏡。上智之聖座。始胎無染原罪。生平毫無玷污。卒世童貞。可敬可嘉。兼之生主耶穌。而施救贖。倘無聖母。又何有耶穌。既重耶穌。又何輕聖母。塵世之人尙云。母以子貴之義。其子既稱爲救世之天主。其母則乃天主之母。既重其子。焉有不重其母哉。不惟今日吾儕重之尊之。即使當日耶穌未孕之先。主遣使天神請安預報。事見聖經。聖路加第一章二十八節云。天神入告曰。受恩之女。

安。主佑爾。諸女中惟爾見寵。此乃天神尊敬之詞。又第二章五十一節云。耶穌在納匝肋縣住居。孝順聽命。祈禱做活路。是即天主尊敬之爲母也。及後耶穌受難。被釘十字架上。以目視愛徒若望而謂母曰。是即爾子。又視母謂若望曰。是即爾母。由此而觀。可見耶穌之尊重其母。亦云至也。彼教言。聖經未稱瑪利亞爲聖母。然人子之事親。幼而順。長而聽命。豈得以顯揚爲孝哉。無非三年傳教。身在外遊。即或有以瞻養其母。何在言之不言爲重乎。此際吾主專意傳教。不暇言論其母之事。即言不尊其母。昔日禹王治水八年於外。三過其門而不入。豈得謂之無情乎。即觀其托母於徒一事。固知其己爲救世心切。即返天堂。

不能孝養其親。而托諸愛徒。不使其母冷落失所。知徒即如己之盡心盡力。以代勞也。其後尙在世一十六年。享壽六十三歲。其十六年內。痛念耶穌受難釘死。復活升天。救贖之功。每年必與其徒。記憶追思。按日而立瞻禮。嗣後蒙召升天。使徒輩知其死而復活。連身升天。故以天主聖母稱之敬之。彼教云。若瑪利亞當敬。則瑪利亞之母亦當敬。推而上之。及其祖宗亦當敬。此言乃頑梗之詞。非明人智士之語也。然則彼教之敬耶穌。以聖經爲憑。聖經論耶穌基斯督族譜。又何不推而上之。及其祖宗不當稱耶穌之教。當稱爲達味王亞巴郎之教。可乎不可乎。只知責人不知責己。可謂責人則明。處己則暗。吾儕之敬聖母者。

因其獨生之子。爲救世之天主。旣云救世獨生之子。必不遐棄其母。吾輩以耶穌親授宗徒之經。爲天主經。而求天主。以天神預報朝賀之言。爲聖母經。求聖母轉達於獨生之子。以母求子。諒獲見允。縱使允與不允。聽之而已。惟其自滿本分。效諸聖人聖女等。尊其爲吾人之慈母。自宗徒之後。世代相傳。並非今時之私舉也。焉得受彼教之誣辱哉。彼教絕斷聖傳。背逆教皇。毀謗古聖先賢。固非一端。不惟聖母及諸聖人聖女。遭其批評凌削。即在天之主。尙且受其輕視。何況人乎。倘若各行各道。殊無差訛。然因彼教刊書傳世。毀辱至甚。諸君幸察其始末。勿爲近世之亂言。搖憾其心。而墮其志於彀中。各宜思之。勉之慎之。

剖惑至言目錄

剖惑至言總論

見一張

論真教假教

見二張

羅德祿紀畧

見五張

恩利格紀畧

見七張

加未諾紀畧

見九張

宣傳聖經辯

見十一張

敬十字聖像辯

見十三張

貼主牌紀

見十六張

祕跡赦罪

見十七張

洗滌祕跡

見十八張

主教神父之神權

見二十張

堅振祕跡

見廿一張

告解祕跡

見廿二張

念經祈禱

見廿六張

聖體祕跡

見廿八張

終傳祕跡

見廿九張

品級祕跡

見三十張

婚配祕跡

見卅一張

論貞德

見卅二張

論齋素

見卅六張

論敬聖母

見卅八張



剖惑至言終

MAISON MERE DES SŒURS
MISSIONNAIRES DE L'IMMACULÉE-CONCEPTION
2900, CHEMIN SAINTE-CATHERINE
MONTREAL, P. Q., CANADA

